

Baez Gaujsi He Gvaqlaeng.....

一次考试过后.....

Mboengqneix gou maez hwnj geij bonj sawgovai, doeklaeng nguh hagsib lo, geizgyang gaujsi gaxgonq hix mbouj nyinhcaen fuzsiz gunghgo. Mwh gauj yijvwnz, miz haujlai daez gou mbouj rox guh. Yawj bouxwnq nyinhcaen gaujsi, gou simgip dangq-maz. Doeklaeng gou luenh sij dapanq hwnjbae couh gyau sigenj lo. Gauj sat le, haujlai doengzhag gangj baez yijvwnz gaujsi neix mbouj nanzguh, haujlai daez cungj dwg lauxsae heuh daihgua boih gvaq. Gou gag siengj, baezneix camj lai lo, baez gaujsi neix haengjdingh dwg ndaw ban boux gauj ndaej cei ca lo.

Daengz ngoenz gunghbu gaujsi cingzcek, gou caeuxcaeux couh ndiu

lo, ninz youq ndaw mbouj mbouj gamj hwnqdaeu, ndawsim gig mboujonj. Daxmeh daeu heuh gou hwnqmbonq, yawj gij yiengh gou le naeuz: “Baenzlawz ha? Bingh la?” Gou dingq le, ganjip swnh bak naeuz: “Meh, gou lumjbaenz bingh lo, daengx ndang hojsouh, mwngz bang gou cingj ngoenz gyaj he ba.” Daxmeh ganjip aeu dijvwnhcin h daeu rau, naeuz: “Mbouj ndat ha, mboujmiz couh bae veiswnghsoj yawj bingh ba!” Baez dingq daxmeh yaek daiq gou bae veiswnghsoj, gou ganjip naeuz: “Gaej sai cienz lo, gou ninz yaep ndeu couh ndei lo, mwngz bang gou cinggyaj gonq ba.” Daxmeh yawj gou lumj miz maz mbouj deng, couh cam naeuz:

“Mwngz mbouj lumj baenzbingh ha, mwngz miz gijmaz saeh muenz gou ba?” Gou aeu denz hoemq gyaeu, mbouj gamj gangj vah. “Caiq mbouj gangj gou couh moeb mwngz loha!” Daxmeh sing hung hwnjdaeu. Daxmeh huj lo, gou ganjip naeuz: “Baez yinjvwnz gaujsi neix gou gauj ndaej mbouj ndei, ngoenzneix lauxsae senhbu cingzcek, gou lau saetnaj, ndigah couh.....” Daxmeh dingq gou gangj le engq huj lo, de rag gou hwnqmbonq, soengq gou bae hagdangz.

Daengz hagdangz le, daxmeh aeu gij saeh gou cang bingh haenx lwnh hawj lauxsae nyi. Gou naj nding dwk ngaem gyaeu roengzdaeu mbouj gamj gangj vah. Lauxsae vah naek cingz



laeg doiq gou naeuz: “Siujcoz, simcingz mwngz gou gojyij lijgaj, hoeng yungh fuengsik cang bingh mbouj ndaej gaijgez vwndiz, lij saet bae bouxwnq doiq mwngz saenq-nyaemh, yienghneix mwngz saet bae haenx mbouj dandan dwg baez gaujsi cingzcek he bw.....” Dingq gij vah lauxsae le, gou ngaem gyaeu daengz diegnaengh gou, ndawsim ienqhoij dangqmaz.

(sei q nienzgaep Liengz Siujcoz)



Yienghneix Cij Dwg Lwgnyez Ndei

这样才是好孩子

Ngoenzsinghiz banringz, Siujmingz daeujaengz henz naz, yawjyawj vamiuz majhung mbouj-caengz.

Siujmingz yawjraen duzgoep he saetdiuq, de siengj: Gou gaeb daeu guhcaemz yaep he, wnggai mbouj miz gijmaz saeh ba. Siujmingz couh gaebdawz duzgoep.

Siujmingz cungj guhfap neix deng daxgoeng youq henz naz haenx yawjraen lo. Daxgoeng naeuz: “Duzgoep dwg baengzyoux ndei vamiuz, dwg bangfwngz ndei nungzminz, hix dwg baengzyoux ndei daihgua. Vamiuz danghnaeuz mbouj miz baengzyoux neix, couh deng nonhah hangz lo.” Siujmingz dingq le, ndawsim gag siengj: Gou laihnaeuz gaeb duz song duz goep mbouj miz maz youqgaenj, yawjdaeu gij siengjap gou loek lo. Siujmingz sikhaek cuengq duzgoep roengz naz bae lo.

Mwhde, daxgoeng yaengx hwnj mehfwnz naeuz: “Mwngz caen dwg boux lwgnyez ndei gyaezhoh daswyenz he.”

(ngeih nienzgaep Lij Yangz)

Dauqdaej Dwg Byawz Huzduz Lo

到底是谁糊涂了

Ngoenzsinghiz, gou buenx daxbuz bae cawx byaek. Henz loh miz dan gai makbingzgoj he, gij makbingzgoj haenx youh hung youh nding, gou yawj dwk myaiz cungj rih lo. Daxbuz raen gou yawj gij makbingzgoj ndwnj myaiz myab-myab, couh naeuz: “Mwngz siengj gwn, daxbuz couh cawx hawj mwngz!”

Daxbuz cam boh' au gai makbingzgoj: “Makbingzgoj gaen geijlai cienz?”

“Gaen 3 maenz.” Boh' au yiedeingz dwk naeuz.

“Baenzlawz baenzneix bengz? Cienh di, 10 maenz 3 gaen gai hawj gou ndaej lo.”

Boh' au dingq le bibi fwngz, naeuz: “Mbouj ndaej, makbingzgoj gou youh hung youh van, mbouj

ndaej caiq cienh lo!”

Daxbuz riunymnyum naeuz: “Couh 10 maenz 3 gaen ba, caengh hawj gou 3 gaen!”

Boh' au mbouj cingznyiengh naeuz: “Ndei ba, gai hawj mwngz.”

Gou yied dingq yied huzduz: Gaen 3 maenz, 3 gaen wnggai dwg 9 maenz, daxbuz baenzlawz yied ganggyaq yied bengz lone? Engq geizheih dwg, boh' au gingqyienz mbouj nyienh gai! Dauqdaej dwg gou huzduz lo, roxnaeuz daxbuz caeuq boh' au huzduz lo?

Mwhhaenx, boh' au caengh ndei makbingzgoj, daxbuz yaek hawj cienz. Gou ragdawz daxbuz, sing iq caem coenz he: “Daxbuz, 3 gaen ciuq yienzyaq dwg 9 maenz, mwngz baenzlawz ganggyaq daengz 10 maenz ne? Neix

mbouj dwg yied ganggyaq yied bengz ha?”

Daxbuz caeuq boh' au gai makbingzgoj fwt singi gvaqdaeu, cungj riuha ha lo.

(sam nienzgaep Lij Mingzcwz)



Gangjgyaq

砍价



Ngoenzhaenx, daxboh daxmeh caeuxcaeux couh okbae banhsaeh lo, gou sij cozyez sat le, sawqmwh siengj hwnj lauxsae ciengz gangj yaek bang bohmeuh guh di saeh. Gou guh ndaej gijmaz ne?

Seizhaenx, daej laeuz cienz

daeu sing hemq: “Sou huqrwix lo——” Gou sawqmwh siengj hwnj geij ngoenz gonq daxmeh sousib ndawranz, dawz haujlai bauqceij gaeuq cuengq youq gwnz yangzdaiz. Deng lo! Neix mbouj cingq dwg baez gihvei bang daxboh daxmeh he ha? Yienghneix gou buet daengz bakcueng hemq boh' au, gvaq yaep he, boh' au sou huqrwix daengz bakdou ranz gou, gou cam boh' au: “Bauqceij gaeuq gaen geijlai cienz?” Boh' au itmienh caengh itmienh naeuz: “Gaen sei q gak haj, mwngz gizneix itgungh roek gaen.”

Gou siengj: “Boh' au dwg mbouj dwg yawj gou iq yaeuh gou ne? Gou geiq ndaej daxmeh daiq gou bae hawciengz cawx byaek cungj gangjgyaq, ngoenzneix gou hix gangjgangj yawj. Gou doiq boh' au naeuz: “Seiq gak haj daiq bengz lo, mwngz cawz lingzdaez

bae, gaen sei q gak ndaej lwi?” “Ndae, sei q gak couh sei q gak!” Boh' au han ndaej gig vaiq, ndenq cienz hawj gou, gipgip muengz-muengz roengz laeuz bae lo.

Banngaiz, daxboh daxmeh dauqma lo, gou angq dwk aeu gienh saeh gou baenzlawz gai bauqceij gaeuq haenx gangj hawj daxboh daxmeh nyi, caj gyoengqde haenx gou. Byawz rox, gyoengqde dingq le cungj riuha ha, loengh dwk gou mbouj rox gijmaz saeh. Daxmeh naeuz gou nyi: “Daxmeh cawx byaek dwg aenvih daxmeh dwg bouxcawx; mwngz gai bauqceij gaeuq, mwngz dwg bouxgai, bouxgai baenzlawz gangjgyaq ne? Baezlaeng mbouj-lwnh guh gijmaz saeh, cungj yaek ndeindei doengh' uk cij ndaej bw!”

Laxlawz, gangjgyaq hix yaek doenghdoengh uk ha!

(sam nienzgaep Hanz Fazmingz)